

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 11/3

31 մայիսի 2016 թ.

Քննարկվեց «Վի Դի Գրուպ» ՍՊԸ գանգատը ՀՀ ՖՆ իրավաբանական վարչության պետի 29.02.2016թ-ի թիվ 312667/02 որոշման դեմ:

«Վի Դի Գրուպ» ՍՊԸ գանգատում բերված փաստարկները.

«Վի Դի Գրուպ» ՍՊԸ-ն 2015թ-ի հուլիսի 3-ին ԵՏՄ անդամ պետության տարածք իրականացրել է գազի բալոնների ժամանակավոր արտահանում՝ դրանց լիցքավորման և հետ վերադարձման նպատակով: Նշված բալոնները լիցքավորված ներկրվել են ՀՀ տարածք նույն թվականի հուլիսի 30-ին: 2016թ-ի փետրվարի 2-ին Էրեբունու ՀՏ-ից ստացվել է գրություն, որում տեղեկացվում էր, որ սահմանված ժամկետում չի ներկայացվել արտահանման հարկային հայտարարագիր և ներմուծողի հաշվառման վայրի հարկային մարմնի հաստատած ապրանքների ներմուծման և անուղղակի հարկերի վճարման մասին ներմուծողի լրացրած հայտարարությունը: Ի պատասխան վերը նշված գրության պարզաբանման նպատակով 2016թ-ի փետրվարի 15-ին Էրեբունու ՀՏ են ներկայացվել ապացույցներ, մասնավորապես՝ հաշիվ ապրանքագիր և պայմանագիր, որոնցում նշված է, որ ժամանակավոր արտահանված բալոնների նպատակը հանդիսանում է լիցքավորումը և բալոնները ենթակա չեն վաճառքի: Մինչ խնդիրը գտնվում էր պարզաբանման ընթացքում 29.02.2016թ-ին ՀՀ ՖՆ իրավաբանական վարչության պետի որոշմամբ ընկերության տնօրեն Վահան Մնացականյանը Վարչական իրավախախտումների վերաբերյալ ՀՀ օրենսգրքի 169.1 հոդվածի 2-րդ մասով ենթարկվել է վարչական պատասխանատվության՝ 20.000 դրամի չափով, 2015թ-ի հուլիս ամսվա արտահանման հայտարարագիրը չներկայացնելու համար: Սակայն 2016թ-ի մարտի 21-ին Էրեբունու ՀՏ-ից ստացվել է թիվ 660 առ 15.03.2016թ. գրությունը, որում պարզաբանվել է, որ «Վի Դի Գրուպ» ՍՊԸ-ն պարտավոր չէր ներկայացնել արտահանման հայտարարագիր, քանի որ գազի բալոնների արտահանման դեպքում բացակայել է օտարման գործարքը:

Ելնելով վերոգրյալից և ղեկավարվելով «Վարչարարության հիմունքների և վարչական վարույթի մասին» ՀՀ օրենքի դրույթներով գանգատաբերը խնդրում է վերացնել ՀՀ ՖՆ իրավաբանական վարչության պետի 29.02.2016թ-ի թիվ 312667/02 որոշումը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննելով 29.02.2016թ. վարչական իրավախախտման վերաբերյալ արձանագրությունը և կից նյութերը պարզել է, որ «Վի Դի Գրուպ» ՍՊԸ տնօրեն Վահան Մնացականյանը

սահմանված ժամկետում չի ներկայացրել 2015թ. հուլիս ամսվա արտահանման հայտարարագիրը: Նկատի ունենալով, որ արարքը նախատեսված է Վարչական իրավախախտումների վերաբերյալ ՀՀ օրենսգրքի 169.2-րդ հոդվածի 2-րդ մասով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին կետով ՀՀ ՖՆ իրավաբանական վարչության պետի կողմից 29.02.2016թ-ին ընդունվել է վարչական իրավախախտման գործի վերաբերյալ թիվ 312667/02 որոշումը (այսուհետ նաև Որոշում), որով Վահան Մնացականյանը ենթարկվել է վարչական պատասխանատվության՝ գումարով 20.000 դրամի չափով:

Վերոգրյալի կապակցությամբ հարկ է նշել, որ «Հայաստանի Հանրապետության և Եվրասիական տնտեսական միության անդամ պետությունների միջև անուղղակի հարկերի հաշվարկման և վճարման առանձնահատկությունների մասին» ՀՀ օրենքի 3-րդ հոդվածի 1-ին մասի համաձայն. ««Անուղղակի հարկերի մասին» արձանագրության 3-րդ և 4-րդ կետերի կիրառության իմաստով Հայաստանի Հանրապետության տարածքից ԵՏՄ անդամ պետություններ արտահանված ապրանքների օտարման գործարքների նկատմամբ ԱԱՀ-ի գրոյական դրույքաչափի կիրառությունը և (կամ) ակցիզային հարկից ազատումը հիմնավորելու համար արտահանողն իր հաշվառման վայրի հարկային մարմին է ներկայացնում միայն հետևյալ փաստաթղթերը.

1) արտահանողի լրացրած՝ արտահանման հարկային հայտարարագիրը. »:

Քննարկվող դեպքում Վահան Մնացականյանը վարչական պատասխանատվության է ենթարկվել 2015թ-ի հուլիս ամսվա արտահանման հայտարարագիրը չներկայացնելու համար, այն դեպքում, երբ «Վի Դի Գրուպ» ՍՊԸ կողմից 2015թ-ի հուլիսի 3-ին ԵՏՄ անդամ պետության տարածք արտահանված գազի բալոնները լիցքավորվելուց հետո նույն թվականի հուլիսի 30-ին ներկրվել են ՀՀ տարածք: Այսինքն, ապրանքների օտարման գործարք տվյալ դեպքում չի իրականացվել:

Ելնելով վերոգրյալից՝ Հանձնաժողովը գտնում է, որ «Հայաստանի Հանրապետության և Եվրասիական տնտեսական միության անդամ պետությունների միջև անուղղակի հարկերի հաշվարկման և վճարման առանձնահատկությունների մասին» ՀՀ օրենքի 3-րդ հոդվածի 1-ին մասով նախատեսված արտահանման հարկային հայտարարագիր ներկայացնելու պարտավորություն «Վի Դի Գրուպ» ՍՊԸ տնօրեն Վահան Մնացականյանը չի կրել:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

Բեկանել ՀՀ ՖՆ իրավաբանական վարչության պետի 29.02.2016թ-ի թիվ 312667/02 որոշումը, իսկ գործը՝ կարճել:

Հանձնաժողովի նախագահ՝



Վ.ՄԻՐՈՒՄՅԱՆ